

1. ივანე ჯავახიშვილის სახელობის თბილისის სახელმწიფო უნივერსიტეტის (შემდგომში: უნივერსიტეტი) გაცვლითი პროგრამების მონაწილე, უცხოეთის აკრედიტებულ უმაღლეს საგანმანათლებლო დაწესებულებაში (შემდგომში: უცხოური უსდ) სასწავლებლად მყოფი უნივერსიტეტის სტუდენტი (შემდგომში: სტუდენტი) განცხადებით მიმართავს შესაბამისი ფაკულტეტის დეკანს სტუდენტის სტატუსის აღდგენის და უცხოეთის უსდ-ში დაგროვილი კრედიტების აღიარების მოთხოვნით.
2. სტუდენტის განცხადებაში უნდა მიეთითოს: უცხოური უსდ-ს დასახელება, ფაკულტეტი, სპეციალობა (საბაკალავრო, სამაგისტრო, სადოქტორო პროგრამა), სწავლის პერიოდი, გავლილი სასწავლო კურსები (მოდულები), მიღებული შეფასებები, მინიჭებული კრედიტები (მათი არსებობის შემთხვევაში), ან სასწავლო კურსების მოცულობა (საკონტაქტო საათების რაოდენობა) ([ფორმა 1](#)).
3. სტუდენტის განცხადებას თან უნდა ერთვოდეს საზღვარგარეთ სწავლის დამადასტურებელი დოკუმენტაციის ასლები და მათი ნოტარიულად დამოწმებული თარგმანი.
4. ფაკულტეტის დეკანის სახელზე განაცხადის გაკეთების პარალელურად, სტუდენტმა უნდა მიმართოს სსიპ განათლების აკრედიტაციის ეროვნულ ცენტრს უცხოეთში გაცემული საგანმანათლებლო დოკუმენტების აღიარების მოთხოვნით (ინფორმაციისთვის იხ.: [www.nea.ge](http://www.nea.ge)).
5. საზღვარგარეთ სწავლის დროს დაგროვილი კრედიტების აღიარება შესაძლებელია მოხდეს უცხოეთში გაცემული საგანმანათლებლო დოკუმენტების აღიარების თაობაზე სსიპ განათლების აკრედიტაციის ეროვნული ცენტრის დასკვნის წარმოდგენამდე. სტუდენტს არ მიენიჭება შესაბამისი აკადემიური ხარისხი, უცხოეთში გაცემული საგანმანათლებლო დოკუმენტების აღიარებამდე.
6. იმ შემთხვევაში, თუ სსიპ განათლების აკრედიტაციის ეროვნულმა ცენტრმა არ აღიარა უცხოეთში გაცემული საგანმანათლებლო დოკუმენტები, სტუდენტს გაუუქმდება აღიარებული კრედიტები, ფაკულტეტის დეკანის წარდგინების საფუძველზე უნივერსიტეტის რექტორის სპეციალური ინდივიდუალური ადმინისტრაციულ-სამართლებრივი აქტით.
7. ბოლონის პროცესის წევრი უცხოური უსდ უზრუნველყოფს სტუდენტთან ე. წ. სასწავლო ხელშეკრულების (learning agreement) გაფორმებას და სწავლის დასრულების შემდეგ მისთვის ე. წ. ნიშნების ფურცლის (transcript of records) გაცემას ბოლონის პროცესის ფარგლებში შემუშავებული სპეციალური ფორმების შესაბამისად. ამ შემთხვევაში სტუდენტი წარმოადგენს სასწავლო ხელშეკრულებას და ნიშნების

ფურცელს, რომელშიც მითითებული იქნება მის მიერ გავლილი სასწავლო კურსების/მოდულების სახელწოდება, კრედიტების რაოდენობა და მიღებული შეფასება.

8. იმ შემთხვევაში, თუ უცხოური უსდ ვერ უზრუნველყოფს სტუდენტს სასწავლო ხელშეკრულებითა და ნიშნების ფურცლით, მაშინ სტუდენტს უნდა მიეცეს შესაბამისი პასუხისმგებელი სტრუქტურის და პასუხისმგებელი პირის მიერ დამოწმებული ოფიციალური დოკუმენტი, რომელშიც მითითებული იქნება: მის მიერ გავლილი სასწავლო კურსების/მოდულების სახელწოდება, ECTS კრედიტები და მიღებული შეფასება.

9. თუ უცხოური უსდ იყენებს არა ECTS კრედიტებს, არამედ სასწავლო კურსებისთვის კრედიტების მინიჭების განსხვავებულ სისტემას, მაშინ სტუდენტმა უნდა წარმოადგინოს უცხოური უსდ–ს ოფიციალური დოკუმენტი, რომელშიც მითითებული იქნება ამ სისტემის შესაბამისობა ტრანსფერისა და დაგროვების ევროპულ საკრედიტო სისტემასთან (ECTS).

10. თუ უცხოურ უსდ–ს არ გააჩნია სასწავლო კურსებისთვის კრედიტების მინიჭების სისტემა, მაშინ სტუდენტის ნიშნების ფურცელში (სასწავლო ბარათში, ან სწავლის დამადასტურებელ შესაბამის დოკუმენტში) მითითებული უნდა იყოს თითოეული სასწავლო კურსის/მოდულის მოცულობა (სემესტრული საკონტაქტო საათები). აღნიშნულ კურსებს ენიჭება პირობითი კრედიტები „ტრანსფერისა და დაგროვების ევროპული საკრედიტო სისტემის (ECTS) შემოღებამდე გავლილი უმაღლესი განათლების სასწავლო კურსებისთვის კრედიტების მინიჭების წესის“ შესაბამისად.

11. იმ შემთხვევაში თუ უცხოური უსდ იყენებს შეფასების არა 100-ქულიან, არამედ განსხვავებულ სისტემას, მაშინ სტუდენტმა უნდა წარმოადგინოს უცხოური უსდ–ს ოფიციალური დოკუმენტი, რომელშიც განმარტებული იქნება შეფასების ეს სისტემა და მისი შესაბამისობა შეფასების 100 ქულიან სისტემასთან.

12. იმ შემთხვევაში თუ უცხოურ უსდ–ში მოქმედი სტუდენტთა ცოდნის შეფასების სისტემა ითვალისწინებს არა ქულებს, არამედ შეფასების აღმნიშვნელ ლათინურ ასოებს (A, B, C, D, E, A+, A, A- და სხვ.) ან სიტყვიერ განსაზღვრებას (ფრიადი, ძალიან კარგი, კარგი, საშუალო, დამაკმაყოფილებელი) და არ არსებობს ამ სისტემის განმარტების ოფიციალური დოკუმენტი, მოცემული სისტემის გადაყვანა უნივერსიტეტში მოქმედ სისტემაზე მოხდეს შემდეგი წესით:

A +	ფრიადი	100
A	ფრიადი	95
A -	ფრიადი	91
B +	ძალიან კარგი	90
B	ძალიან კარგი	85
B -	ძალიან კარგი	81

C +	კარგი	80
C	კარგი	75
C -	კარგი	71
D +	საშუალო	70
D	საშუალო	65
D -	საშუალო	61
E +	დამაკმაყოფილებელი	60
E	დამაკმაყოფილებელი	55
E -	დამაკმაყოფილებელი	51

13. იმ შემთხვევაში, თუ უცხოური უსდ იყენებს აღნიშნული დადგენილების მე-12 პუნქტში მითითებული შეფასების სისტემებისგან განსხვავებულ სისტემას, კომისია უფლებამოსილია, დაადგინოს ამ სისტემის შესაბამისობა უნივერსიტეტში მოქმედ შეფასების სისტემასთან.

14. იმ შემთხვევაში, თუ უცხოური უსდ ვერ უზრუნველყოფს უნივერსიტეტის გაცვლითი პროგრამის მონაწილე სტუდენტის სრულ სემესტრულ მომსახურებას და სტუდენტი მისგან დამოუკიდებელი მიზეზების გამო ვერ აბარებს საბოლოო გამოცდებს და, შესაბამისად, ვერ ენიჭება კრედიტები, მაშინ მან უნდა წარმოადგინოს უცხოური უსდ-ს ოფიციალური დოკუმენტი, რომელშიც მითითებული იქნება მის მიერ გავლილი სასწავლო კურსების მოცულობა (სემესტრული საკონტაქტო საათები) და სტუდენტის შუალედური შეფასებები. საბოლოო გამოცდას სტუდენტი აბარებს საკუთარ ფაკულტეტზე, აღნიშნულ კურსთან თავსებად საგანში.

15. უნივერსიტეტის გაცვლითი პროგრამის მონაწილე და/ან უცხოურ უსდ-ში დროებით სასწავლებლად წასული სტუდენტის მიერ უცხოურ უსდ-ში გასავლელი სასწავლო კურსები წინასწარ უნდა იყოს შეთანხმებული შესაბამისი საგანმანათლებლო პროგრამის ხელმძღვანელთან (კოორდინატორთან) და/ან კომისიასთან.

16. უნივერსიტეტის გაცვლითი პროგრამის კოორდინატორი და ECTS ინსტიტუციური კოორდინატორი გაცვლითი პროგრამის მონაწილე სტუდენტის სასწავლო ხელშეკრულებას ადასტურებენ ხელმოწერით. სტუდენტს წერილობით ეცნობება, რომ უცხოურ უსდ-ში გავლილი კურსების თავსებადობას უნივერსიტეტის კურიკულუმთან და სტუდენტის მიერ არჩეულ ძირითად და დამატებით პროგრამებთან დაადგენს კომისია.

17. უცხოურ უსდ-ში სწავლის დროს დაგროვილი კრედიტების აღიარება ხდება “ივანე ჯავახიშვილის სახელობის თბილისის სახელმწიფო უნივერსიტეტში სტუდენტთა მობილობის ფარგლებში გადმოსვლის მსურველ და/ან გადმოსულ, აღდგენილ სტუდენტთა კრედიტების აღიარების წესის” შესაბამისად.

18. გამონაკლისის სახით, სტუდენტის მიერ უცხოურ უსდ–ში მიღებული ე. წ. “არადიფერენცირებული ჩათვლა” შეიძლება აღიარებულ იქნას კომისიის მიერ იმ შემთხვევაში, თუ დასტურდება, რომ უცხოურ უსდ–ს აღნიშნულ სასწავლო კურსში დიფერენცირებული (ქულობრივი) შეფასება არ გააჩნია. ამ შემთხვევაში ე. წ. “არადიფერენცირებულ ჩათვლას” ენიჭება პირობითი ქულა „ტრანსფერისა და დაგროვების ევროპული საკრედიტო სისტემის (ECTS) შემოღებამდე გავლილი უმაღლესი განათლების სასწავლო კურსებისთვის კრედიტების მინიჭების წესის“ შესაბამისად.

19. გამონაკლისის სახით, კომისიამ შეიძლება აღიაროს სტუდენტის მიერ უცხოურ უსდ–ში გავლილი ისეთი სასწავლო კურსი, რომელსაც არ ითვალისწინებს უნივერსიტეტის კურიკულუმი, მაგრამ რომელიც მისი მიზნებიდან და სწავლის შედეგებიდან გამომდინარე მნიშვნელოვანია სტუდენტის სამომავლო კვალიფიკაციისა და პროფესიული განვითარებისათვის.